

Խոյեցիների ու նախիջևանցիների արշավանքից հետո Երևանի խանը, հակառակ իր սյուլեերեն Հերակլ II-ի կամքի, արշավում է Նախիջևանի վրա, բայց վաղաժամ ցրտերը ստիպում են նրան ձեռնունայն վերադառնալ⁵։ Շատ շանցած՝ 1791 թ. դեկտեմբերին Ղարաբաղի Երրահիմ և Ավարայի Օմար (Ումմա) խաների արշավանքը Նախիջևանի վրա դրդում է Երևանի, Նախիջևանի ու Խոյի խաներին մոտանալ իրենց նախկին թշնամուկները և համատեղ ուժերով հաջողությամբ դիմադրել հարձակվողներին, հարձակում, որը մեծամեծ վտանգներով էր հղի ոչ միայն Նախիջևանի, այլև նրա սահմանակից Երևանի ու Խոյի խանությունների համար։

Պահպանվել և լավ վիճակում մեկ են հասել Ղուկաս Կարնեցու այս «Պատմութեան» թե՛ րմնագիրը⁶, և թե՛ սևագիր օրինակը⁷, որոնց միջև տարբերություններ չկան, չհաշված այն, որ ընդունված սովորության համաձայն, սևագրի վրա նշված չէ ամսաթիվը, դա արվում էր նամակը մաքրագրելու և առաքման ժամանակ։ Ղուկաս Կարնեցու այս նամակը փոքր ինչ չափով օգտագործված է Հ. Շահխաթունյանցին վերագրված պատմական երկի 1-ին մասում, ինչպես նաև մեր «Երևանի խանությունը XVIII դարի վերջում» աշխատության մեջ⁸։

Պատմութիւն գալսեան խոյեցւոց և նախջւանցւոցն յերկիրս Երևանու, և վնասուցն զոր անցուցին ընդ սա և ընդ սուրբ Աթոսս

Ծանիր ցառակից սիրելիդ մեր Մինաս զգօնամիտ վարդապետ⁹։ Քանզի, որպէս յատաչ զրեցար սիրելոյդ, մանուկ խանն¹⁰ մեր, լուեալ թէ Խօյու խանի եղբայր Զաֆարղուլի բէկն¹¹ զօր գումարեալ գայ ի վերայ երկրիս, և ևս թէ՛ Նախշուանու խանն¹² ապստամբեալ է յինքենէ, սա ևս զօր ժողովեալ զնաց ընդդէմ նոցա։ Ի հասանիլ սորա ի Տիգա ամրոցն, որ է ի սահման երկրին Նախշուանու, մարտ էր եղեալ ընդ ամրոցին, բայց ոչ կարացեալ վնաս ինչ հասուցանել ամրացիլոցն, յիւրոց զօրացն բազումք հարեալք էին։ Յայնժամ այնու ձախորդութեամբ տարակուսեալ զոլով, լուեալ էր ևս թէ Զաֆարղուլի բէկն և Նախշուանու Քեալպալի խանն միարանեալ ծանր զօրօք գան ի վերայ իւր։ Ուստի երկուցեալ դարձաւ անտի և եկեալ յերևան ի Մուխաննաթ թափայն։

5 Մատենագարան, ձեռ. № 4501, էջ 287ա, 336բ։

6 Մատենագարան, Արխիվային բաժին, Կաթողիկոսական դիվան, թղթ. 6, վավ. 189։

7 Նույն տեղում, ձեռ. № 4501, էջ 284ա—284բ։

8 «Պիւան հայոց պատմութեան», հ. Ա—Բ, Թիֆլիս, 1893, էջ 18—23; Վ. Ռ. Գրիգորյան, «Երևանի խանությունը XVIII դարի վերջում», Երևան, 1958, էջ 143—147։

9 Մինաս վարդապետը «Մեծին Պօլսոյ և շրջակայիցն նուիրակ»-ն էր («Պիւան հայոց պատմութեան», հ. Գ, էջ 534), որի հետ Ղուկասը նամակազրական աշխույժ կապի մեջ էր, և որին ուղղված նրա նամակներից մի քանիսը հրատարակված են «Պիւան»-ի Գ հատրում։

10 Խուսքը վերաբերում է Երևանի Մուհամադ խանին (1772—1805 թթ.), որն իշխանության էր անցել իր եղբոր՝ Ղուլամ Ալիի սպանությունից հետո (1784 թ. 7 հունիսի) և նկարագրված անցքերի ժամանակ 18 տարեկան էր։

11 Խոյի Ահմեդ խանի որդին էր, որ հօր սպանությունից հետո (1786 թ. փետրվար) իր ավագ եղբոր՝ Հուսեյնի հետ միասին մասնակցում էր երկրի կառավարմանը։ Հետագայում դառնում է Խոյի խան։

12 Նախիջևանի խանն էր Քյալաբլին, որը հետագայում ամուսնանում է Երևանի Մուհամադ խանի քրոջ հետ և 1797 թ. Աղա-Մուհամադ խանի կողմից կուրացվելուց հետո տեղափոխվում է Երևան, իր ազգականների մոտ, և ակտիվորեն մասնակցում երկրի քաղաքական կյանքին (տես՝ Акты, собранные Кавказской археографической комиссией, т. 1, Тифлис, 1866, էջ 158)։